

## 四無礙解 (12-17-1863)

又云四無礙智、四無礙辯。是為諸菩薩說法之智辯。故約於意業而謂為解，謂為智。約於口業而謂為辯。

一、法無礙。名句文能詮之教法名為法。於教法無滯。名為法無礙。

二、義無礙。知教法所詮之義理而無滯。名為義無礙。

三、辭無礙。又云詞無礙。於諸方言辭通達自在。名為辭無礙。

四、樂說無礙。又云辯說無礙。以前三種之智為眾生樂說自在。名為樂說無礙。

又契於正理起無滯之言說。名為辯無礙。無滯之言說即辯也。

智度論二十五曰。「四無礙智者：義無礙智、法無礙智、辭無礙智、樂說無礙智。」

涅槃經十七曰。「菩薩摩訶薩。能如是知得四無礙。法無礙。義無礙。辭無礙。樂說無礙。」

仁王經下曰。「得無礙解。法義詞辯。演說正法。」

俱舍論二十七曰。「無礙解總說有四。一、法無礙解。二、義無礙解。三、詞無礙解。四、辯無礙解。」

法華玄贊二曰。「四辯者。即四無礙解。」